



Na osnovu člana 8. Zakona o sistemu indirektnog oporezivanja u Bosni i Hercegovini, ("Službeni glasnik BiH", broj 44/03 i 52/04) direktor Uprave za indirektno oporezivanje Bosne i Hercegovine, donosi

U P U T S T V O
za korištenje bankovnih garancija u carinskom postupku

A. OPĆE ODREDBE

1. Ovim uputstvom uređuje se postupak izdavanja bankovne garancije u carinskim postupcima, postupak i način prihvatanja garancije, te sadržaj i način korištenja garancije za osiguranje naplate indirektnih poreza definisanih članom 1 stav 2 . Zakona o sistemu indirektnog oporezivanja u BiH , za koje je Uprava za indirektno oporezivanje BiH mjerodavna naplaćivati prilikom uvoza, izvoza ili provoza robe, kao i kamate koje bi mogle nastati u vezi indirektnih poreza.
2. Izdavanjem bankovne garancije banka se obavezuje da će platiti indirektno poreze, uvećane za kamatu (u daljem tekstu: dug) , koje korisnik garancije do njihove dospelosti nije platio.

B. OBLIK I VRSTE GARANCIJA

3. Garancija se može položiti u obliku:

- gotovinskog depozita i
- pomoću jemca.

Osoba od koje se zahtjeva polaganje garancije slobodna je izvršiti izbor oblika garancije.

4. Gotovinski depozit daje se u valuti BiH ili odgovarajućem iznosu strane valute prema važećem kursu Centralne banke BiH.
 5. Polaganje garancije uz pomoć jemca može biti u obliku:
 - a) pojedinačne garancije za:
 - carinski postupak stavljanja robe u slobodan promet , carinske postupke s ekonomskim učinkom i privremeni smještaj robe (Obrazac 1),
 - carinski postupak provoza (Obrazac 2)
 - b) sveobuhvatne garancije za:
 - carinski postupak stavljanja robe u slobodan promet , carinske postupke s ekonomskim učinkom i privremeni smještaj robe (Obrazac 3)
 - carinski postupak provoza (Obrazac 4)
 6. Garancija mora sadržavati sljedeće podatke:
 - broj garancije,
 - rok važenja garancije,
 - iznos garancije,
 - odredbu o njoj primjeni "na prvi poziv" i "bez prigovora",
-

- podatke o izdavaocu garancije (naziv banke, identifikacioni broj, sjedište, adresa, broj transakcijskog računa koji se vodi kod Centralne banke BiH, ovlašteno lice, potpis ovlaštenog lica za zastupanje banke, pečat banke garanta),
- podatke o korisniku garancije: (naziv korisnika, jedinstveni identifikacioni broj, sjedište, adresa, broj transakcijskog računa koji se vodi kod banke izdavaoca garancije, ovlašteno lice),
- odredbe o preuzimanju garancijskih obaveza iz prethodnog perioda,
- mjesto i datum izdavanja garancije,
- ovjeru garantnog ureda o prihvatanju garancije (broj, datum, potpis ovlaštenog službenika i pečat).

Bankovna garancija izdaje se u skladu sa obrascima iz priloga ovog Uputstva čiji su sastavni dio.

7. Pojedinačnu garanciju korisnik garancije podnosi kao instrument osiguranja za plaćanje pojedinačnog duga, a sveobuhvatnu kao instrument osiguranja plaćanja svih dugova koji su nastali ili bi mogli nastati u roku važenja garancije, u određenim carinskim postupcima.
- Sveobuhvatna garancija se može podijeliti na dvije ili više carinskih ispostava ili carinskih referata u okviru regionalnog centra, odnosno može se koristiti za dva ili više carinskih postupaka, osim ako za pojedine carinske postupke nije drugačije propisano.

C. PRIHVATANJE I OVJERA GARANCIJA

8. Uz zahtjev za ovjeru, korisnik garancije podnosi tri primjerka bankovne garancije na ovjeru Regionalnom centru (garantni ured) – Odsjek za poslovne usluge, kod kojeg se kao instrument osiguranja namjerava koristiti i specifikaciju o rasporedu sredstava po garanciji (Obrazac 5).

Garantni ured na osnovu podnešene dokumentacije rješava o prihvatanju garancije. Ukoliko garantni ured ne prihvati bankovnu garanciju, o istom donosi odluku.

Dva primjerka prihvaćene garancije vraćaju se korisniku garancije od kojih jedan dostavlja izdavaocu garancije. Jedan primjerak prihvaćene garancije zadržava garantni ured, s tim da se isti u kopiji, dostavlja Središnjem uredu Uprave za indirektno oporezivanje - Sektor za poslovne usluge i carinskim uredima na koje se odnosi zajedno sa specifikacijom, ako je ima.

Garantni ured odmah po prihvatanju garancije obavještava carinske ispostave i carinske referate o prihvaćenoj garanciji.

D. ROK VAŽENJA, NAPLATA, PRAĆENJE I POVLAČENJE GARANCIJA

9. Rok važenja sveobuhvatne bankovne garancije ne može biti kraći od šest mjeseci, odnosno kraći od roka u kojem dug može nastati.
- Nalog za naplatu duga iz garancije nastalog u roku važenja garancije može se podnijeti jemcu najkasnije u roku od 90 dana od dana isteka roka važenja garancije. Nalog za naplatu iz garancije sa pregledom dospjelog a neizmirenog duga, garantni ured dostavlja jemcu, a jedan primjerak tog naloga se sa pregledom neizmirenog duga dostavlja i korisniku garancije (Obrazac 7).

10. Na pisani zahtjev korisnika garancije, garantni ured će vratiti položenu garanciju ako utvrdi da su plaćeni svi dugovi pokriveni tom garancijom i da dug ne može više nastati, odnosno da je namirenje duga osigurano drugim odgovarajućim instrumentom.

Banka garant može povući jemstvo u svako doba bez navođenja razloga. U tom slučaju pisani zahtjev se dostavlja garantnom uredu i garancija se otkazuje 30- tog dana, odnosno 16-tog dana kod postupka provoza , od dana zaprimanja zahtjeva, s tim da banka može odrediti i duži rok za otkazivanje garancije. U takvim okolnostima garancija vrijedi za sve dugove koji su do dana povlačenja garancije bili osigurani otkazanom garancijom.

Korisnik garancije ne može koristiti garanciju za namirenje duga od dana kada je podnio zahtjev za otkazivanje garancije, u kom slučaju će garantni ured izvršiti provjeru svih dugovanja po odnosnoj garanciji i u slučaju eventualnih dugovanja ne može odobriti otkazivanje garancije do izmirenja duga.

Ako je rok važenja bankovne garancije istekao , a osigurani dug nije izmiren, odnosno još uvijek može nastati, nova garancija koja se podnosi mora sadržavati i odredbu da se iz nje može naplatiti dug obezbijeđen prethodnom garancijom.

Carinske ispostave odnosno carinski referati su u obavezi voditi evidenciju o garancijama koje se na njih odnose i kontinuirano pratiti njihovo zaduženje i razduženje (Obrazac 6).

E. PRELAZNE ODREDBE

11. Garancije koje su do dana stupanja na snagu ovog uputstva prihvaćene od garantnih ureda u skladu sa Instrukcijom direktora Uprave za indirektno oporezivanje BiH broj 01-16-6802 od 27.12.2004.godine, mogu se u carinskim postupcima koristiti do isteka roka važenja u kojem se koriste.

Garancije koje su prihvaćene od bivših carinskih uprava i carinske službe Brčko Distrikta mogu se koristiti u carinskim postupcima do isteka roka važenja, a najkasnije do **30.06.2005 godine**.

F. ZAVRŠNE ODREDBE

12. Za sve ono što nije regulisano ovim uputstvom, primjenjivat će se odgovarajuće odredbe Zakona o carinskoj politici BiH ("Službeni glasnik BiH", broj 57/04) i Odluke o provedbenim propisima Zakona o carinskoj politici BiH ("Službeni glasnik BiH", broj 63a/04).
13. Pojednostavljenja u carinskom postupku provoza, koja se odnose na korištenje bankovnih garancija, propisana Odlukom o provedbenim propisima Zakona o carinskoj politici BiH, od člana 243. do člana 255., neće se primjenjivati u carinskim postupcima do stvaranja uslova za njihovu primjenu, tj. do definisanja kriterija za ocjenu i stvaranja baze podataka istih.
14. Stupanjem na snagu ovog uputstva, prestaje da važi Instrukcija direktora UIO BiH broj 01-16-6802 od 27.12.2004. godine, za korištenje bankovnih garancija.
15. Ovo uputstvo stupa na snagu danom donošenja .